

# Scolina – fasa da furmaziun sutstimada

DA MARTÍN CAMENISCH

■ **Schon anc sturn. La scolina (ni la «scoletta», sco intgins Rumantsch schessan en lur idiom) promova tenor la lescha da scola chantunala «las forzas creativas da l'uffant e ses svilup corporal, spiertal, social ed emoziunal, enritgescha il mund d'eveniments e d'experiencias da l'uffant e tgira l'expressiun linguistica da l'uffant».** Uschenavant cler e gist: La scolina n'è betg da patratgar davent en la furmaziun dad in uffant. E tuttina legiain nus vina-vant: «La frequentaziun da la scolina è da princip voluntara.» Co? Pussaivel?

Pelva in passus incredibel! Curius e perturbond che questa fasa uschè impur-

tanta en nosa vita n'è betg obligatoria sco la scola primara che suonda, navair? Natiralmain giogan sper la scolina e la scola ils geniturs e las famiglias ina rolla indiscutabla en il svilup dals uffants. Quantas famiglias dentant consistan per exempel anc dad in vast dumber dad uffants che ston s'arranschar, far cumpro-miss ed emprender vicendaivlamain? Las plivalurs centralas da las scolinas cun mussaders/mussadras che socialiseschan, instrueschan ed accumpognan èn indiscutablas. Uschiglio pudess ins gist era metter en dumonda la scola populara en sia totalitad.

D'accord: En il chantun Grischun sco er en Svizra en general frequenta la gronda part dals uffants la scolina. E tuttina –

ella n'è betg obligatoria. Quai ha era per consequenza che mussadras e mussaders n'han betg in status equivalent a magisters e scolastas. Gist en il territori rumantsch cumenzan be anc paucas persunas la furmaziun da mussadras/mussaders (l'onn 2016/17 per exempel insumma nagina). Betg da smirvegliar – ina tala scolaziun n'è era betg fitg attractiva areguard ils aspects numnads. E tuttina – la scolina è indispensabla ed ultra-impurtanta.

Vitiers vegn: cun ina scolina obligatoria pudess ins offrir en la Scola auta da pedagogia studis pli lucrativs – per exempel ina furmaziun che permetta dad instruir tant en scolina sco er en ils emprims dus stgalims primars (betg per ca-

sualitad ils quatter onns dal ciclus 1 en il nov plan d'instrucziun!).

In sguard enturn (che fa adina bain) demussa: En Svizra è la scolina ni eba la «scoletta» obligatoria en bunamain tut ils chantuns: cun excepziun dal Uri, Valais ed eba dal Grischun. Tuna arcaic. Puspè ina giada las restanzas dals «purs» e da las «puras suveran(a)s» che na lessan betg perder in'autonomia? HarmoS che vuleva curreger questas differenzas è vegnì refusà il 2008. En autras domenas pon arguments dad adversaris esser stads pli contestabels – franc dentant betg en quel da dar a la scolina ed als mussaders/a las mussadras la valita ch'ella(s) merita(n).

**L'autur è istoricher e docent a la Scola auta da pedagogia dal Grischun**

